

Asttiri Maxaafaa

Gidduwaa Erissuwaa

Asttiri maxaafan odettida taariketi Parsse kawoi balggo balggo de7iyo sohuwan polettidaageeta. He taariketi ba gita xalaaninne ba asaa siiqiyi gita siiquwan, morkketi biittaappe xaissana haniyo ba asaa ashshida, Asttiro giyo Aihudatu minee taarikiya minttidi odoosona. Ha maxaafai Aihudati bonchchiyo, Puriima geetettidi erettiya baalaa doomettaanne a birshshettaa loittidi odee.

Kawiyyaa Asxxiina Kawuwaa Arxxekssiisa Azazuwaa Ixxasuu

1 ¹⁻²Hagee Kawoi Arxxekssiisi Hindde biittaappe Toophphiyya biittaa gakkanaashin de7iya, xeetanne laatamanne laappun biittata haariyo wode hanidabaa. I uttidi haariyo waanna katamai Suusa geetettees.

³I kawotido heezzantto laittan, baappe garssaara haariyaageetussinne biittaa aissiyaageetussi gita gibiraa giigissiis. He gibiraa sohuwan Meedoonganne Parsse biittaa ola gadaawati, biittaa halaqatinne aissiyaageeti beettidosona. ⁴Kawoi issi xeetanne hosppun tammu gallassaa kumettaa ba kawotettaa duretettaanne ba bonchcho anggaa ubbaa eta bessiis.

⁵He gallassatuppe guyyiyaa, kawoi qassikka hara laappun gallassau gam77iya gibiraa, Suusa kataman, duriyaappe manquwaa gakkanaashin de7iya asa ubbaassi giigissiis. He gibirai kawo keettaa ataakilttiya sohuwan giigiis. ⁶He sohuwan de7iya dabaabai, liinuwaappe dadettida boottanne salo milatiya magalashotun puulatti uttiis. Magalashotikka ochcha teera milatiya lo77o liinuwaa baqettan aattin, ibinabarade giyo shuchchaappe oosettida dizggiyyaa bollan de7iya biri migidotun kaqetti uttidosona. Qassi worqqaappenne biraappe oosettida arssati, dumma dumma merai de7iyo al77o shuchchatupenne inqqotuppe oosettida baasuhan maaran yegetti uttidosona. ⁷Issoi issuwaappe dumma gidida worqqa burcukkuwan woine eessai asa ubbaassi imettees; kawoikka daro keha gidido gishshau, woine eessaassi zawi baawa. ⁸SHin issi issi asi ba koyogaa keenaa uyees; hegaa kawoi kasetidi, ba ashkkaratussi odi wottiis.

⁹He wode Kawiyyaa Asxxiinakka maccaasa ubbaassi gibiraa kawuwaa keettan giigissaasu.

¹⁰Gibirai doomettido laappunta gallassi, Kawoi Arxxekssiisi woiniyaa eessaa alidi ufaittido wode, ba ashkkarata Mahumaana, Bizzta, Harboona, Biigita, Abagita, Zetaaranne Karkkaasa geetettiya laappun mureessata xeegidi, ¹¹“Kawiyyo Asxxiino kawotaa kallachchaa goxissidi, haa ekki yiite” yaagidi azaziis. Aissi giikko, a keehippe puulanchcha gidiyo gishshau, halaqatinne asai ubbai o be7ana mala, kawoi koyiis. ¹²SHin kawuwaa azazuwaa mureessati odin, Kawiyyaa Asxxiina kawuwaa sinttau yeennan ixxasuu. Hegee kawuwaa hanqquwaa suulissiis.

¹³⁻¹⁴Hegaa gishshau, kawoi gita maatai de7iyo laappun Parsenne Meedoona sunttata xeesidi gelissiis. Eti Karshshaana, SHetaara, Adimaata, Tarsseesa, Mereesa, Marssananne Mamukaana geetettoosona. He asati aadhdhida eranchchanne he biittaa higgyaanne de7uwaa wogaa minttidi eroosona. Hagaa malabaassi kawoi ubba wodekka eta oichchees.

¹⁵Kawoi eta, “Taani, Kawoi Arxxekssiisi, ta mureessatu bolli kiittin, Kawiyyaa Asxxiina ta azazuwaa polennan ixxasuu. Hegaa gishshau, higgee odiyo maaran o waatanau bessii?” yaagidi oichchiis.

¹⁶Oichchin etappe issoi, Mamukaani kawuwaa sinttaaninne halaqatu sinttan zaaridi, hagaadan yaagiis; “Kawiyyaa Asxxiina kawuwaa xalaala gidennan de7ishin, a halaqata ubbaanne a kawotettaa giddon de7iya asaa ubbaa naaqqaasu. ¹⁷Aissi giikko, ha kawotettaa giddon de7iya maccaasai ubbai Kawiyyaa Asxxiina oottidoogaa siyidi, ba azinaa azinaa karanaa doommana. Etikka, ‘Kawoi Arxxekssiisi baakko yaanaadan xeegissin, Kawiyyaa Asxxiina ixxabeikkeeyye!’ yaagana. ¹⁸Hegaa xalla gidennan, Parsenne Meedoona halaqatu

maccaasati hagaa siyido wode, hachchi awai wullanaashinkka bantta azinata hegaadan giidi karana. Hegan maccaasatuppenne azinatuppe gidduwan ooshhai darana.

¹⁹"Hegaa gishshau kawuwau, neeni dosikko, Kawiya Asxxiina naa77antto ne sintti aadhhdhennaadan teqqiya awaajuwaa kessa; he awaajoikka naa77antto laametténna mala, Parsenne Meedoona higgiya giddon xaafetto. Hegaappe guyyiyan, a kawiyo gidiyo bonchchuwaa ippe kehiya harannissi imma. ²⁰Aissi giikko, ha neeni aatido awaajoi ha gita kawotettan ubban odettiyo wode, issi issi maccaasiyaa dure gidin, manqqa gidin, shaakkennan ba azinaa bonchchana" yaagiis.

²¹Yaagin kawoinne a halaqati ha zoriyan ufaittidosona. Hegaa gishshau, Mamukaani giidoogaadan kawoi oottiis. ²²I ba kawotettaa giddon de7iya dumma dumma biittatussi eta pitaliyaaninnee eta qaalan xaafidi, dabddaabbiyaa kiittiis; he awaajoi, issi issi azinai ba keettaa keettaa aissiya halaqa gidiyoogaa odeeis.

Asttira Kawiyo Gidaasu

2 ¹Hegaappe simmin, Kawuwaa Arxxekssiisa hanqdoi dochchiis; dochchin Kawiya Asxxiina oottidobaanne ikka i bollan kessido awaajuwabaa qoppisi. ²He wode kawo keettan oottiya ashkkarati a hagaadan yaagidosona; "Lo77o puulaara de7iya geela7o macca naata koyidi, kawuwaassi ehaana mala, ³ne kawotettaa giddon de7iya biittatu ubban halaqata suntta. Etikka lo77o puulaara de7iya geela7o macca naata dooridi, Suusa katamaa ehiidi, maccaasau giigida keettan wottona. Hegan he maccaasaa keettuu halaafe gidiya kawo mureessaa Hegaaya kushiyani eti de7ishin, eta puulaa loittiyaabai ubbai etau imetto. ⁴Hegaappe guyyiyan, kawuwaabbaappe aadhdhada ufaissiya geela7iyaa Asxxiini sohuwan kawiyo gidu" yaagidosona. Yaagin ha zoree kawuwaabbaappe gishshau, kawoi hegaadan oottiis.

⁵Hegan Suusa kataman issi Marddikiyoosa giyo Aihuda biittaa asi de7ees. Ikka Yaa7iira na7aa; Yaa7iiri SHim77a na7aa; SHim77i Biniyaama zare gidiya Qiisa na7aa. ⁶Baabiloone Kawoi Naabukadanaxoori Yihudaa Kawuwaa

Yo7aakiinanne hara Aihuda asaa olan omooddidi efiido wode, Marddikiyoosi etaara issippe biidaagaa. ⁷Gido shin, i he biittan de7iiddi, ba aawaa ishaa na7iyo, Ibraisxxe qaalan Hadaaso geetettiya Asttiro banaara wottidi dichchees. Asttira merankka qottankka keehi puulanchcha. I aawainne aayyiyan haiqvoogaappe guyyiyan, Marddikiyoosi o efiidi, ba macca na7iyo oottidi dichchiis.

⁸Kawoi kessido awaajuwaanne azazuwaa maaran, Suusa katamaa ehiido doorettida daro geela7otuppe issinna Asttiro. Akka yaada, maccaasau giigida keettaa halaafe gidiya Hegaaya giyoogaa aawatettan uttaasu. ⁹Hegaayi Asttiro be7ido wode, in keehippe ufaittiis; o dumma xeelliis. Yaatidi sohuwaarakka maanau dumma qumaanne bollaa gorppettiyo tishshaa iyyo immiis. Qassi iyyo oottanau kawo keettaappe doorettida laappun danggiriixeta suntidi, maccaasau giigida keettan, kifile ubbaappe aadhdhidi lo77iya kifiliyan onne i danggiriixeta efiidi wottiis.

¹⁰Marddikiyoosi iyyo kasetidi odidoogaadan, Asttira Aihuda asa gidiyoogaa oossinne odabeikku.

¹¹Qassikka Marddikiyoosi Asttiri payyatettaanne iyyo haniyaabaa eranau, maccaasaa keettaa sinttaara hachchi hachchi yaanne haanne hemettees.

¹²Geela7oti kawuwaakko gelanaappe kasetidi, issi laittaa kumettaa bantta puulaa loittiiddi gam77oosona; hegeekka, koiro usuppun aginnaa karbbiyaa zayitiyan gorppetiiddi gam77idi, naa77antto usuppun aginnaa qassi, lo77o sawiya shittawan gorppetoosona. ¹³Hegaappe guyyiyan, issi geela7iyaa kawuwaakko geliyo wodee gakkio wode, ba koyido maayuwaa maaya puulattada, maccaasaa keettaappe kiyada, kawoi de7iyoosaa gelausu. ¹⁴Qammi gelada, kawuwaara aqidoogaappe hini baggan, wonttin maallado kiyausu. Kiyin kawo baakkoti de7iyo hara keettaa o efoosona. Efin he keettaassi halaafe gidiya kawo mureessai SHa7ishagaazi o naagees. Kawoi dosidinne i sunttaa xeegidi, "Onakko chiite" gaana xayikko, a naa77antto kawuwaakko gelanau danddayukku.

¹⁵Hegaa gidishin, kawuwaakko geliyo kayai Asttiro gakkii. Asttira

Marddikiyoosa aawaa ishaa Abihaila na7iyo; Marddikiyoosi ba na7iyo kessidi dichchidooro. A maccaasau giigida keettuu halaafe gidiya kawo mureessai Hegaayi zoridoogaadan maayuwaa maayaasu. O be7ida ubbai i puulaa nashshiis.¹⁶ Arxxekssiisi kawotido laappuntta laittan, Tebeeta giyo tammantta aginan Asttira kawoi de7iyoosaa gelaas.

¹⁷Gelido wode, kawoi hara maccaasa ubbaappe aattidi, o dosiisinne hara geela7otu ubbaappe in ufaittiis. Hega gishshau, kawotaa kallachchaa i huuphiyan goxxidi, o Asxxiini sohuwan kawiyo kessiis.¹⁸ Hegaappe guyyian, kawoi Asttiri bonchchuwaassi gita gibiraa giigissiis. Giigissidi halaqatanne biittaa aissiyaageeta xeesiis. Qassi ba kawotetttaa giddon ufaissa baalai bonchchettana mala awaajjidi, imotaakka ba kehatetttaa keenaa huuphiyan huuphiyan immiis.

Marddikiyoosi Kawuwaa SHemppuwaa Ashshiis

¹⁹Hegee hegaadan de7ishin, Marddikiyoosi kawuwaa keettan halaqa gididi sunttettiis.²⁰ Asttira Aihuda asa gidiyoogaa ha77i gakkanaashinkka oossinne odabeikku. O Marddikiyoosi, "Odoppa" giido gishshau, kase na7atettan azazettiiyoogaadan, ha77ikka ayyo azazettaasu.

²¹Marddikiyoosi kawo keettan oottiiddi de7iyo wode, kawoi de7iyo kifileta gelijo penggiyaa naagiya kawo mureessatuppe naa77ati, Bigitaaninne Tereshi Kawuwaa Arxxekssiisa morkkidi, woranau maqettidosona.²²Eta maqquwaa Marddikiyoosi siyidi, Kawee Asttirissi yootin, akka Marddikiyoosa sunttan kawuwaassi yootaasu.²³Yootin kawoi yohuwaa loittidi, qordi xeelliyo wode, yohoi tuma gjididi beettin, he naa77u asata kocan kaqqidi woriis. Ha hanotettaikka Kawuwaa Arxxekssiisa Taarikiyaa Xaafiyoo Maxaafan xaafettiis.

Hamaani Aihudata Xaissanau Maqettiis

3 ¹Hegaappe guyyian, Kawoi Arxxekssiisi Hamaana giyo issi banaara oottiyaagaayyo sunttatettaa xoqqissidi, ba halaqatuyyo halaqa oottidi sunttiis. Hamaana aawai Hammadaati Aihudatu morkkiyaa, Agaaga zare.²Kawoi azazi wottido gishshau, kawo keettuu

penggen oottiya halaqati ubbat Hamaani kanittiyo wode, gulbbatidi a bonchchoosona. Gido shin, Marddikiyoosi Hamaanassi gulbbatennaaninne bonchchennan ixxiis.³ He wodiyan kawo keettuu penggen oottiya halaqati Marddikiyoosa, "Kawuwaa azazuwa polennan aissi ixxai?" yaagidi, "hachchi hachchi odoosona; shin i eti odiyoogaa siyanau koyibeenna. Ubba qassi, "Taani Aihuda asa gidiyo gishshau, Hamaanassi gulbbatanaunne a bonchchanau danddayikke" yaagiis.

Hegaappe guyyian eti, "Ha Marddikiyoosi odiyo gaasuwaa siyidi, Hamaani waananddeeshsha!" giiddi, ayyo yootidosona.⁵ Marddikiyoosi baayyo gulbbatennaagaanne bana bonchchennaagaa Hamaani erido wode, hanquwaa tamaadan eexxi kiyiis.⁶ Hegaa bollikka qassi, Marddikiyoosi Aihuda asa gidiyoogaa eriis; eridi a xalaalaa qaxxayiyoogee lafabaa giidi qoppido gishshau, Arxxekssiisa kawotetttaa giddon de7iya Aihuda zariyaa ubbaa woranau halchchiis.

⁷Arxxekssiisi kawotido tammanne naa77antto laittan, Niisaana giyo koiro aginan, Aihudata woriyo aginaanne gallassaa eranau, Puriima giyo saamaa a sinttan yegganaadan, Hamaani azaziis. He saamai wodhdhido maaran, Adaare giyo tammanne naa77antta aginan, tammanne heezzantto gallassai Aihudati wuriyo gallassa gidiyoogee qashettiis.

⁸Hegaappe guyyian, Hamaani Kawuwaa Arxxekssiisassi hagaadan yaagidi yootiis; "Ne kawotetttaa giddon mulesan laalettidi de7iya issi zare asati de7osona; eta de7uwaa maaraai hara asaagaappe dumma; hegaa xalla gidennan, eti kawuwaa higginyaassikka haarettokkona. Hegaa gishshau, neeni eta de7ona gaada co77u giikkoo, hegee lo77o gidenna.

⁹Hegaa gishshau kawuwau, ha qofai nena ufaissikko, ha asata wori xaiisana mala, awaajuwaa kessa. Hegaa ne oottikko, taani heezzu xeetanne oitamu sha7u kilo giraame deexxiya biraa kawo buquraa minjjiyo keettuu gelissanaadan, ne kawotetttaa aissiyaageetussi immana" yaagiis.

¹⁰Yaagin kawoi ba maataa erissanau awaajuwaa bolli wottiyo migido maatafaa

ba biradhdhiyaappe kessidi, Aihudatu morkkiyaa, Agaaga zariyaa, Hammadaata na7aa Hamaanassi immiis. ¹¹Kawoi Hamaana, "Neeni immana giido birai ne achchan de7o; shin ha asatu bolli ne dosidobaa ootta" yaagiis.

¹²Hegaa gishshau, koiro aginan, tammanne heezzantto gallasan, Hamaani kawuwaa xaafeta ubbata xeegiis. Xeegidi, he awaajoi biitta ubban de7iya asaassi dumma dumma qaalaaninne dumma dumma pitaliyan xaafettidi, kawoppe garssaara biittaa haariyaageetukko, auraajja haariyaageetukkonne dere halaqatu ubbaakko kiitettanaadan azaziis. Awaajoikka Kawuwaa Arxxekssiisa sunttan xaafettidi, migido maatafai a bolli wodhdhoogaappe hini baggan, ¹³eesotiya wottanchhati a kawotettaa biittaa ubbaa gattanaadan kiitettidosona. He awaajoi, "Adaare giyo tammanne naa77antto aginan tammanne heezzantto gallasan, Aihuda ubbaa, yelaga cimaa, maccaa attumaa, naatakka ashshennan mexi issi gallassi wurssi worite; eta aquwaakkbonqqite" yaagees. ¹⁴Hegaa gishshau, he keerido gallassai gakkiyo wode, asi ubbi giigettanaadan, he awaajoi biittau ubbau kiittiisinne asau ubbau awaajjettiis.

¹⁵Kawuwaa azazuwan eesotiya wottanchhati biitta ubbaakko kiitaa gattidosona. Qassi Suusa katamankka odettiis. Yaatin, Suusa katamaa asai ubbai shabbirettiis. SHin kawuwaaranne Hamaanaara issippe utidi, woiniyaa eessaa uyoosona.

Marddikiyoosi Asttiro Maaduwaa Woossiis

4 ¹Marddikiyoosi ha hanidabaa ubbaa siyido wode, azzanidi ba maayuwaa pooshshiis; pooshshidi waaruwaa maayiis; ba huuphiyankka bidintaa qoliis. Ba cengurssaakka xoqqu oottidi, misho yeehuwaa yekkiiddi, katamaa giddon yuuyiis. ²Yuuyiiddi, kawo keettaa gelijo penggiyaa gakkanaashin biis; shin gelanau danddayibeenna. Aissi giikko, waaruwaa maayidi, kawo keettaa gelanau oossilinne danddayettenna. ³Kawuwaa awaajoi siyettido biitta ubban Aihudatu giddon gita

⁴Kawee Asttiri danggiriixetinne o naagiya mureessati yiidi, Marddikiyoosabaa iyyo odido wode, a keehippe azzanaasu. Azzanada Marddikiyoosi waaruwaa kessirggidi maayana mala, ayyo hara maayuwaa kiitaasu; shin i ekkennan ixxiis. ⁵Hegaappe guyyiyian Asttira, kawoi iyyo oottanaadan wottido Hataaka giyo mureessaa xeegada, Marddikiyoosa metoi aibakkonne qassi i aibissi kayyottiyaakkonne erana mala, akko kiitaasu. ⁶Kiittin, Hataaki kawuwaa keettaa gelijo penggiyaa mata dabaaban de7iya Marddikiyoosakko biis. ⁷Bin Marddikiyoosi, ba bolli gakkidabaa ubbaa qonccissidi, ayyo yootiis. Qassikka Aihudata worissi wurssanau Hamaani kawuwaa buquraa minjiyo keettau immanau geppido miishshaa likkiyara ubbai attennan geeshshidi yootiis. ⁸Hegaa xalla gidennan, Aihudata wurssanau Suusa kataman kiyida awaajoi xaafettido woraqataakka Hataakassi immidi, hegaa Asttirissi immanaadaaninne haniyaabaa ubbaa iyyo yootanaadan odiis. Qassi Asttira kawuwaakko gelada, ba asai wurennaadan gaannatana mala, Hataakassi yootiis.

⁹Hataaki yiidi, Marddikiyoosi kiittidobaa ubbaa Asttirissi yootiis.

¹⁰Yootin Asttira Hataaka zaarada, Marddikiyoosakko hagaadan yaagada kiitaasu; ¹¹"Higgee, 'Macca gidin, attuma gidin, ooninne xeegettennan de7iiddi, kawuwaara gaittanau kawo keettasshi giddo dabaabaa gelikko, haiqqa. SHin i xeegettennan kawuwaakko gelijo wode, kawoi worqqaappe oosettida ba kawotaa xam77aa xeeraa akko zaaridi bessikko, he uraa xalaalai atto' yaagees. Ha higgiyaa kawuwaara zorettiyaageetuppe biidi, coo asaa gakkanaashin de7iya asi ubbi erees. SHin taani hasttam u gallassa gidoosappe kawuwaakko gelanau xeegetta erikke" yaagaasuu.

¹²Marddikiyoosi Asttira kiittido kiitaa siyidoogaappe guyyiyian, ¹³iyyo zaaruwaa kiittiiddi, hagaadan yaagiis; "Neeni, 'Taani kawo keettan de7iyo gishshau, hara

attana; shin neeninne ne aawaa keettaa asai haiqqana. Neeni kawiyo gidada yiidoogee hagaa mala wodiyaassakkonne ooni erii?" yaagiis.

¹⁵Asttira Marddikiyoosassi hagaadan yaagadaa zaarada kiuttaasu; ¹⁶"Ba; baada Suusa kataman de7iya Aihudata ubbaa issippe shiishsha. SHiiqidi xoomiiddi, taassi woossite. Heezzu gallassainne heezzu qammai wuranaashin, quma mooppite; haattaa uyoppite. Taanikka ta danggiriietuura hegaadan xoomana. Hegaappe guyyiyani, i ubba higgiyan teqettidaagaa gidikkokka, kawai de7iyo sohuwaa taani gelana. Taani haiqqikkonne haiqqana" yaagaasu.

¹⁷Marddikiyoosi biidi, Asttira a azazidoogaadan mulebaa oottiis.

Asttira Gibiraa Giigissaasuu

5 ¹Xoomaa doommoosappe heezzantto gallassi Asttira kawotaa maayuwaa maayada, kawo keettan giddo dabaabaa gelada eqqaasu. He dabaabai kawai uttiyo wuigiyaa baazzan de7ees. Kawai kawo keettaa gelijo penggiyaa baazzan de7iya, ba kawotaa araatan uttiis. ²Kawiyya Asttira gelada, giddo dabaaban eqqidaaro kawai be7iis; be7idi in ufaattido gishshau, ba worqqa xam77aa ikko micciis. Akka shiiqada xam77aa xeeraa bochchaasu. ³Kawai o hagaadan yaagiis; "Kawee Asttiree, neeni taakko aibissi yaadii? Qassi neeni tana oichchiyoobai aibee? Harai atto ta kawotettaappe baggaa gidikkokka, taani neeyyo immana" yaagiis.

⁴Asttira zaarada hagaadan yaagaasu; "Kawuwau, nena ufaissiyaabaa gidikko, taani neeyyo giigissido gibiraa maanau neeninne Hamaani naa77ai hachchi omarssi yiyaakko dosais" yaagaasu.

⁵Hegaappe guyyiyani kawai, "Nuuni Asttira giigissido gibiraassi baanau, Hamaana eesuwan ehiite!" yaagiis.

Yaagin naa77aikka he sohuwaa biidosona. ⁶Eti issippe woiniyaa eessaa uyiiddi de7ishin, kawai naa77antuwaas Asttiro, "Neeni tana woossiyoobai aibee? Taani neeyyo immana. Qassi neeni tana oichchiyoobai aibee? Harai atto ta kawotettaappe baggaa gidikkokka, taani ne oishaa polana" yaagiis.

⁷Asttira zaarada hagaadan yaagaasu; ⁸"Kawuwau, neeni tanan ufaittidaba

gidikko, qassi taani woossiyoobaa immanaunne ta oishaa polanaa neeni dosiyaaba gidikko, wontto ta giigissiyo hara gibiraassi neeninne Hamaani yaanaadan oichchais. Taani ai koyiyaakko, he wode neessi qonccissana" yaagaasu.

Hamaana Maqquwaa

⁹Hamaani gibiraa sohuwaappe kiyidi biyo wode, keehippe ufaattido gishshau, ba wozanan poocu giiddi biis. SHin i kawo keettaa gelijo penggiyaa mataara aadhdhidi biyo wode, hegan uttida Marddikiyoosa be7iis; ayyo denddibeennaagaanne yayyidi kokkoribeennaagaa akeekidi, Hamaani hanqquwaa eexxi kiyiis. ¹⁰Gidikkonne, ba hanqquwaa danddayidi biidi, ba soo gakkiis.

Hegaappe guyyiyani, ba laggetanne ba keettaayyiyo Zereesho issippe xeegissidi, ¹¹Hamaani ba duretettaa likkiyaa, ba attuma naatu qoodaa, kawai bana bonchchido bonchchuwaanne hara halaqatuppenne kawo oosanchchatuppe aadhdiya sunttatetaa ayyo immidi, waatidi a bonchchidaakko, etayyo gairiis. ¹²Gujjidikka Hamaani hagaadan yaagiis; "Harai atto Kawiyya Asttirakka ba giigissido gibiraassi kawuwaara baanau taappe attin, haraa oonanne xeegabeikku. Qassi wonttokka kawuwaara baanaadan tana xeesa wottaasu. ¹³SHin he Aihudai Marddikiyoosi kawo keettaa gelijo penggen uttidaagaa be7iyo wode, ha ubbabaietta tana kalissenna" yaagiis.

¹⁴He wode a keettaayyiya Zereeshanne a laggeti ubbai hagaadan yaagidosona; "Neeni ishatamu wara adussa kocaa esissa; yaatada wontto guuraara Marddikiyoosi he kocan kaqettana mala, kawuwa oichcha. Hegaappe guyyiyani, ufaittaidda gibiraa maanau ba" yaagidosona. Hamaana ha qofai ufaissido gishshau, eti giidoogaadan kocaa giigisissiis.

Kawai Marddikiyoosa Bonchchiis

6 ¹He gallassi qammi kawuwa xiskkoi efeennan ixxiis. Hegaa gishshau, kawai Kawa Taarikiyaa Xaafiyoo Maxaafaa ehiidi, hegan xaafettida, kase hanida taariketa ayyo nabbabana mala azaziis. ²Nabbabettida taariketuppe issoi Marddikiyoosi oottidobaa; hegeenne,

kawoi de7iyo kifiliyaa naagiya,
Bigitaananne Teresha giyo naa77u
mureessati kawuwaa woranau maqettido
maqqwaa Marddikiyoosi
qonccissidoogaa.³ Kawoi, "Yaatin, i
hagaa qonccissidoogaassi ayyo imettida
sunttatettai woi woitoi aibee?" yaagiis.

Kawuwaa ashkkarati zaaridi, "Ayyo
aibinne oosettibeenna" yaagidosona.

"Kawoikkka zaaridi, "Kawo keettaa kare
dabaaban oonee de7iyi?" yaagiis. He
wode ba giigissido kocan Marddikiyoosa
kaqqanau, kawuwaa oichchana giidi,
Hamaani kawo keettaa kare dabaabaa
geliiddi de7ees.

⁵ Kawuwaa ashkkarati, "Hamaani hagan
de7ees" yaagidosona.

Kawoi zaaridi, "Haa gela giite"
yaagiis.

⁶ Hamaani geloogaappe guyyiyan
kawoi, "Kawoi bonchchanau dosiyo asayyo
ai oottanau koshshii?" yaagidi oichchiis.

Hamaani, "Kawoi taappe haraa oona
bonchchanau dosi?" yaagidi ba wozanan
qoppiis. ⁷⁻⁸ Hegaa gishshau, Hamaani
kawuwaassi yaagidi zaariis; "Kawoi
bonchchanau dosiyo asaayyo kawoi
maayido ba kawotaa maayuwaa ehiiso.
Qassi ba toggiyo paraa huuphiyankka
kallachchaa goxisso. ⁹ Hegaappe guyyiyan,
banaara oottiya halqaatuppe issi keehi
bonchchettidaagaa xeegissidi, kawotaa
maayuwaa a maizzanaadaaninne kawuwaa
paran a utissidi, katamaa dabaabaa
kessanaadan azazo. Yaatobare he keehi
bonchchetida halaqai a sinttan
hemettiiddi, 'Kawoi bonchchanau dosiyo
urau hagaadan oottees' yaagidi awaajjo"
yaagiis.

¹⁰ Yaagin kawoi zaaridi, Hamaana
hagaadan yaagidi azaziis; "Hodde
eesuwan dendda! Denddada kawotaa
maayuwanne ta paraa ekkada, ne
giidoogaadan Aihudaa Marddikiyoosassi
ootta. I kawo keettaa gelio penggen
de7ees. Ne giidobaappe issibaanne
ashshoppa" yaagiis.

¹¹ Hegaa gishshau, Hamaani
Marddikiyoosa kawotaa maayuwaa
maizzidi, kawuwaa paraa bollan utissiis.
Qassi katamaa dabaaban appa sinttaara
hemettiiddi, "Kawoi bonchchanau dosiyo
urau hagaadan oottees" yaagidi awaajiis.

¹² Hegaappe guyyiyan, Marddikiyoosi
kawo keettaa pengge guyye simmidi biis.
SHin Hamaani daro azzanido gishshau, ba
som77uwaa gullettidi, eesotidi ba soo biis.

¹³ Biidi bana gakkidabaa ubbaa ba
keettaayee Zereeshissinne ba laggetussi
yootiis. Yootin eti a, "A sinttan neeni
kauyyanau doommido ha bitanee,
Marddikiyoosi, Aihuda asa gidikko, ne
aara eqettada, a xoonanau mulekka
danddayakka; tumuppe i nena xoonana"
yaagidosona.

Hamaani Kaqettiis

¹⁴ Eti biron hegaa haasayiiddi de7ishin,
kawuwaa mureessati gakkidi, Hamaana
Asttira giigissido gibiraassi eesoyiiddi
efiidosona.

7 ¹ Efin kawoinne Hamaani Kawee
Asttira gibiraan maanau biidosona.
² He naa77antto gallassa gibiraassi biidi,
eti woiniyyaa eessaa uyiddi de7ishin,
kawoi qassikka, "Kawee Asttiree, neeni
woossiyoobai aibee? Taani neeyyo
immana. Qassi neeni tana oichchiyoobai
aibee? Harai atto ta kawotettaappe bagga
gidikkokka, taani ne oishaa polana"
yaagidi oichchiis.

³ Kawiyyaa Asttira zaarada yaagaasu;
"Kawuwau, neeni tanan ufaittidabaa
gidikko, qassi ta oishaakka polanau neeni
dosidabaa gidikko, ta woosainne ta oishai
taaninne ta asai haiqqennan attanaassa.
⁴ Aissi giikko, taaninne ta asai issoinne
attennan wuri haiqqanau baizellida. Nuuni
baizellidoogee macca aillenne attuma aille
gididi de7anaassa gidiyaakko, taani co77u
gaana; aissi giikko, hegaa mala metoi
kawuwaa waissanau bessiyaabaa gidenna"
yaagaasu.

⁵ Kawoi Arxxekssiisi zaaridi, "Hegaa
oottanau xalidaagee oonee? I he bitanee
awan de7ii?" yaagidi Kawiyo Asttiro
oichchiis.

"Oichchin Asttira, "Nu morkkee, nuna
yedettiyaagee hagaa ha iitaa Hamaana"
yaagaasu.

He wode Hamaani kawuwaa
sinttaaninne kawee sinttan daro
dagammii. ⁷ Kawoi keehippe hanqgettidi,
ba uttosapape denddi eqqidi, kawo keettaa
ataakilttiyya sohuwaa biis. SHin Hamaani
kawoi a bolli iitabaa ehaanau
qachchirrgidoogaa erido gishshau,

Kawiyaas Asttira a haiquwaappe ashshana mala woossanau guyye attiis.

⁸Kawoi kawo keettaa ataaikilttiyaa sohuwaappe simmidi, wontta eti woine eessa uyiyo sohuwaa gelyo wode, Hamaani Kawee Asttirippe maarotaa woossana giidi, a uttido arssaa bollan gufannidaagaa be7iis. Be7idi hanqquwaa eexxi kiyidi, ba qaalaakka xoqqu oottidi, "Laa ha bitanee hagan kawo keettan, ubba qassi ta sinttan, kaweera zin77anau koyiyye?" yaagiis.

Kawoi biron hegaa haasayishin, kawo mureessati yiidi, Hamaana som77uwaa gulleyidosona. ⁹Qassi etappe issoi, Harbboona giyo mureessai, "Kawuwau, Hamaani nena haiquwaappe ashshida Marddikiyoosa kaqqana giidi essido ishatamu wara kocai a son de7ees" yaagiis.

Kawoi zaaridi, "Hamaana efiidi, he kocan kaqqite!" yaagidi azaziis.

¹⁰Hegaa gishshau, Marddikiyoosa kaqqana giidi giigissido kocan Hamaani kaqettiis. Hegaappe guyyian, kawuwaa hanqdoi dochchiis.

Aihudati Bantha Morkketa Zaarettidi Olanaadan Odettiis

8 ¹Aihudatu morkkee Hamaani kagettido gallassi Kawoi Arxxekssiisi Hamaana aquwaa ubbaa Kawee Asttirissi aattidi immiis. Qassi Marddikiyoosi iyyo mata dabbo gidiyoogaa Asttira kawuwaassi yootaasu. Hegaa gishshau, he gallassappe doommidi, Marddikiyoosi kawuwaakko gelanau danddayiis. ²Kawoikkka Hamaanappe guyye ekkido ba migido maatafaa kessidi, Marddikiyoosassi immiis. Immin Asttira Marddikiyoosa Hamaana aquwaa bollan aawayada sunttaasu.

³Hegaappe guyyian, Asttira yeekkaidda, kawuwaa tohuwaa bollan zaarettada kunddada, Agaaga zare gidiya Hamaani Aihudatu bollan tukkido iita maqqoi oosuwan pe7ennaadan kawuwaa woossaasu. ⁴Yaatin, kawoi ba worqqa xam77aa iyyo miccin, a dendda eqqada, hagaadan yaagaasuu; ⁵"Kawuwau, neeni tanan ufaittidabaa gidikko, qassi ta oishaakka polanau neeni dosidabaa gidikko, ne kawotettaa giddon de7iya Aihuda ubbaa wurssidi worana mala,

Agaaga zare gidiya Hammadaata na7ai Hamaani kessido awaajuwaa shaariya hara awaajuwaa neeni kessanaadan woossais. ⁶Ha ubba bashshai ta asaa bollan gakkiyo wode, taani waana xeellanau danddayiyaanaa? Qassi ta dabbotakka muliyaa xaissiyo wode, taani waana xeellanau danddayiyaanaa?" yaagaasuu.

⁷Hegaappe guyyian, Kawoi Arxxekssiisi, Kawiyo Asttironne Aihudaa Marddikiyoosa hagaadan yaagiis; "Hamaani Aihudata woranau awaajuwaa kessido gishshau, taani mittaa kocan a kaqissidoogaanne a aquwaakka ubbaa Kawee Asttirissi immidoogaa intte ereeta. ⁸Gidikkonne, kawo keettaa maatafai wodhdhin, kawuwaa sunttan kiyida awaajoi laamettanau danddayenna. Hegaa gishshau, intte intte baggaara Aihudata maaddanau koyidobaa xaafite. Hegaa ta sunttan xaafidi, kawo maatafaa a bollan wottite" yaagiis.

⁹Siiwaana giyo heezzantto aginan, laatamanne heezzantto gallassan, Marddikiyoosi kawuwaa xaafeta ubbaa xeegiis; xeegidi Hinddeppe Toophphiyaa gakkanaashin de7iya, xeetanne laatamanne laappun biittata kawoppe garssaara haariyaageetussi, auraajja haariyaageetussinne biittaa halaqatussi yeddiyo awaajuwaa xaafissiis. Awaajoi dumma dumma qaalaaninne dumma dumma pitaliyan xaafettiis; qassi Aihudatussikka eta qaalaaninne eta pitaliyan xaafettiis. ¹⁰Marddikiyoosi he awaajuwaa ubbaa Kawuwaa Arxxekssiisa sunttan xaafissidi, kawo maatafaa wottiis. Wottidi kawo keettaa gaaxaatan yelettida, eesotiya parata toggiya asatu bolli biittau ubbau kiittiis.

¹¹Kawoi kessido awaajoi katamatu ubban de7iya Aihudati issippe shiiqanaunne bantha bolli yiyaabaa olettidi teqqanau danddayana mala, maataa etau immees. Qassi ola miishshaa oiqqidi, ai biittappe gidikkokka, eta olanau yiyaageeta, eta naatuuranne eta maccaasaara ubbaa issuwaanne ashshennan wurssi woranaunne eta aquwaakka bonqqidi ekkanau maataa immees. ¹²Aihudati Kawuwaa Arxxekssiisa kawotettan hegaa oottanau keerettida gallassai, Adaare giyo tammanne naa7antto aginaa, tammanne heezzantto

gallassaa. ¹³Kawuwaa awaaajuwa biittatu ubban de7iya asai eranaadan, higge gididi awaaajjettiis; hegeekka Aihudati bantta morkketu bollan haluwaa kiyanau bantana giigissanau danddayissee.

¹⁴Kiitettiyaageeti kawo keettaa parata toggidi, kawuwaa azazuwa gattanau eesotidi biidosona. Qassi Suusa katamankka ha awajoi asa ubbau odettiis.

¹⁵Márdikiyoosi salo milatiyaanne bootta kawotaa maayuwaa maayidi, ochcha teera milatiya kaabbaa, liinuwaappe dadettidaagaa bollaara gujiis; qassi gita worqqa kallachchaalka goxxidi, kawuwaa sinttappe kiyiis. Kiyin Suusa katamai ililiisinne ufaissau poocu giis. ¹⁶Hegee Aihudatussi qassi gita ufaissanne ililssa, woppanne gibira wode gidiis. ¹⁷Hegaa gishshau, kawuwaa awajoi nabbabettido biittaaninne katamaa ubban de7iya Aihudati ubbai gita baalaa awaajjidi, ufaittiiddinne gibiraa miiddi pe7idosona. Hegaa gaaswan Aihudatussi yayyidi, hegan de7iya hara zare asaappe daroti Aihuda gididosona.

Aihudati Bantta Morkketa Woridosona

9 ¹Adaare giyo tammanne naa77antio aginan tammanne heezzantto gallassai gakkiis. He gallassai, kawoi koiro kessido awaaajuwa maaran Aihudatu morkketi eta xoonana giido gallassaa. SHin yohoi aadhdi wodhdhin, Aihudati bantta morkketa xoonidosona. ²Kawuwaa Arxxekssiisa kawotettaa giddon de7iya Aihudati ubbai bantana qohanau koyiya ubbaa xaisanau bantta kataman kataman issippe shiiqidosona. Etaara ai asinnejettanau danddayibeenna; aissi giikko, hara zare gidiya asai ubbai etau yayyiis. ³Ubba qassi Marddikiyoosassi yayyido gishshau, kawoppe garssaara biittaa haariyaageeti, auraajja haariyaageetinne biittaa halaqati ubbai Aihudata haa maaddidosona. ⁴Aissi giikko, Marddikiyoosi kawo keettan gita maatai imettidonne wolqqaa guji guji biya asa gididoogee, he kawotettaa giddon de7iya biitta ubban erettiis.

⁵He keerido gallassi Aihudati bantta morkketa ubbaa bisuwan goora7idi wurssidosona; bantana ixxiya ubbaa bollankka bantta koyaa oottidosona.

⁶Waanna katama gidiya Suusa xallan ichhashu xeetu asaa woridosona. ⁷⁻¹⁰Eti

qassi Parshshanddaata, Dalifoona, Asppaata, Poraata, Adaaliyaa, Ariidaata, Parmmashtta, Ariisaaya, Ariidaayanne Waizaata geetettiya, Aihudatu morkkiya Hamaana naata tammaakka woridosona. SHin eti eta aquwaa bonqqibookkona.

¹¹Aihudati Suusa kataman worido asaa qoodai aappunakko he gallassikka kawuwaayyo odettiis. ¹²Yaatin, kawoi Kawiyo Asttiro hagaadan yaagiis; "Aihudati waanna katama gidiya Suusa xallan ichhashu xeetu asaanne Hamaana naata tammaa woridosona. Hegee hegaa gidikko, kawuwaa biittatun haratun eti woridoogee aappuna gidanddonaashsha! Qassi ha77i neeni woossiyoobai aibee? Taani neeyyo immana. Neeni tana oichchiyoobai harabai aibee? Taani neeyyo polana" yaagiis.

¹³Asttira zaarada, "Kawuwaa ha qofai ufaissikko, Suusa kataman de7iya Aihudati hachchi oottidoogaadan wontokka oottona. Qassi Hamaana naatu tammatu ahaakka kocaa bollan kaqqanaadan azaza" yaagaasu.

¹⁴Yaagin kawoi hegaa oottanaadan azaziis; awaajoikka Suusa kataman naa77antuwa awaajjettin, Hamaana naatu tammatu ahai kocaa bollan kaqettiis.

¹⁵Adaare giyo aginan tammanne oiddantto gallasan, Suusa kataman de7iya Aihudati qassikka issippe shiiqidi, hara heezzu xeetu asaa woridosona; shin ha77ikka eti eta aquwaa bonqqibookkona.

¹⁶He wode Suusa katamaappe gaxaara de7iya kawuwaa biittatun haratun de7iya Aihudatikka issippe shiiqidi, bantta morkketa ubbaa olidi teqqidosona. Eti muleera laappun tammanne ichhashu sha7u asaa woridoogaappe guyyian, bantta morkketuppe shemppidosona. SHin eta aquwaa bonqqibookkona. ¹⁷Hagee ubbai hanidoogee Adaare giyo aginan tammanne hezzantto gallassaana; tammanne oiddantto gallasan eti shemppidi, gibiraa miiddi, uyiiddinne ufaittiiddi pe7iyo gallassa oottidosona.

¹⁸SHin Suusa kataman de7iya Aihudati tammanne heezzanttonne tammanne oiddantto gallassatun woriiddi pe7idi, tammanne ichhashantto gallasan shemppidosona. He gallassaa etikka gibiraa miiddi, uyiiddinne ufaittiiddi pe7iyo gallassaa oottidosona.

¹⁹Hegaa gishshau, qeeri qeeri katamatun de7iya Aihudati hachchi gakkanaashinkka Adaare giyo aginan tammanne oiddantto gallassaa baala gallassa oottidi bonchchoosona. He gallassan moosonanne uyoosona; qassi issoi issuwaassi qumaa imotaa immoosona.

Puriima Baalaa

²⁰Marddikiyoosi ha hanida ubba taarikiya xaafii; xaafidi dabddaabbiyaa Kawuwaan Arxxekssiisa biittatun ubban, haahuwan matan, de7iya Aihuda ubbaassi kiittiis. ²¹He dabddaabbiyan Marddikiyoosi Adaare aginan tammanne oiddanttonne tammanne ichchashantto gallassata, Aihudati laittan laittan baala oottidi bonchchana mala, etayyo yootiis. ²²Aissi giikko, he gallassati Aihudati bantta morkketuppe shemppuwaan demmido gallassata; qassi he aginaikka eta azzanoinne yehoi ufaissaunne gibiraan meettau laamettido agina. Hegaa gishshau, eti muussaaninne ushshan ufaittiiddi, issoi issuwaassinne qassi hiyyeesatussikka qumaa imotaa immiiddi bonchchana mala, etau odettiis.

²³Odettin Aihudati Marddikiyoosi immido azazuwaa ekkidi, eti bonchchanau doommido baalaa laittan laittan aggennan bonchchanau maayidosona. ²⁴Agaaga zaree Hammadaata na7ai Hamaani, Aihudatu ubbatu morkkee, eta xaissanau kase maqettiis; maqettidi eta wurssi woriyo aginaanne gallassaa eranau Puriima giyo saamaa yegissiis. ²⁵SHin Asttira kawuwaakko gelidoogaappe guyyiyan, Hamaani Aihudatu bolli maqettido iita maqqoi ubbai guyye simmidi, a bolli polettanaadan kawoi xuufiyan azaziis. Yaatin, Hamaaninne a naati tammai kocan kaqettidi haiqqidosona. ²⁶Hegaa gishshau, ha naa77u gallassati Puriima Baalaa geettooosona. Ha dabddaabbiyan etau xaafetidabaa ubbaa gaasuhan, eti bantta aifiyan be7idobaa gaasuaaninne eta bollan gakkidabaa gaasuhan ²⁷Aihudati banttassi, bantta zaretussinne Aihuda gidanau koyiya ubbaassi, ha baalaa

bonchchiyoogaa woga ootidosona. Hegeekka laittan laittan aggennan ha naa77u gallassata bonchchanaassa.

²⁸Qassi, ha kawotettaa biittan ubbaaninne katamatun ubban de7iya Aihudatu keetaa asai ubbainne yaana yeleta ubbai ha Puriima Baalaa hassayanau bessiyoogee kuuyettiis. Hegaa bollankka, Aihudati aude gidikkonne, ha Puriima gallassata bonchchanaunne he gallassatun hanidabai eta zariyankka dogettennan agganau bessees.

²⁹Hegaappe guyyiyan, Abihaila na7iyaa, Kawiya Asttiranne Aihudai Marddikiyoosi Puriima Baalaa xeelliyaagan kase xaafido dabddaabbiyaa minttettanau hagaa naa77antto dabddaabbiyaa kumetta maatan xaafidosona. ³⁰He dabddaabbeti Arxxekssiisa kawotettan, xeetanne laatamanne laappun biittan de7iya Aihudatussi ubbaassi saroinne woppai gido giya sarotaara xaafettiidi kiitettidosona. ³¹Qassi eti kase xoomanaunne kayottanau wogaa kessidoogaadan, ha77i eta gidin, sinttappe yaana eta zareta gidin, ha Puriima gallassata laittan laittan woga oottidi bonchchana mala, he dabddaabbeti qonccisoosona. Hegee Aihudai Marddikiyoosinna Kawiya Asttiranne naa77ai maayettidi kessido azazuwaa. ³²Kawee Asttiri azazoi Puriima Baalaa wogaa minttiis; ikka maxaafan xaafettiis.

Kawuwaan Arxxekssiisanne Marddikiyoosa Gitatettaa

10 ¹Kawoi Arxxekssiisi ba kawotettaa giddon ha gaxaappe hini gaxaa gakkanaashin de7iya asai ubbai giiraa qanxxana mala, wolqan azaziis. ²I oottido gitanne maalaalissiya oosoti ubbat, qassi Marddikiyoosakka xoqqu oottidi, waati bonchchidaakko qonccissiya taarikee Meedoonanne Parsse Kawotettaa Taarikiya Maxaafan xaafettiis. ³Maataa baggan gidikko, Kawuwaan Arxxekssiisa istta gin, Marddikiyoosi naa77antto. Qassi i Aihudatunkka keehi bonchchettidanne dosettida asa; aissi giikko, i ba asa gidiya Aihudati, sarotetaaninne hirrgi bainnan de7ana mala, kechi daafurida asa.